

Xanana Hasa'e OJE 2015

Timor Post, 26 Setembru 2014

DILI-Maske Komisaun Revizaun Orsamentu (KRO) preve ona montante \$1.3 billoens, maibe Primeiru Ministru Kay Rala Xanana Gusmao hakarak hasa'e ba \$1.5 billoens ho razaun atu responde planu balun ne'ebe lakonsege implementa iha 2013.

“Konsellu Ministru diskute kona-ba ezekusaun orsamentu 2014 ninian no fó mós informasaun orsamentu tinan fiskál 2015 no ami diskute bainhira mak atu apresenta ba Parlamentu Nasionál. Primeiru Ministru hatete dehan katak hasa'e ba 1.5 billoens, “Primeiru Ministru Ezersisiu, Fernando La-Sama de Araújo informa ba jornalista sira iha Ministériu Negosiu Estranjeiru no Koperasaun (MNEK), Kinta (25/9).

Razaun aumenta orsamentu tinan fiskál 2015, La-Sama informa, hatan ba programa governu nian iha area konstrusaun balun.

Nia hatutan, kada tinan orsamentu sempre aumenta hodi responde nesesidades povu nian tuir Planu Estratejiku Dezenvolvimentu Nasionál.

La-Sama fó ezemplu, bainhira labarik ida halo tinan ida tenke uza mós roupa ne'ebé bo'ot kompara ho estadu tenke aumenta mós orsamentu kada tinan liu-hosi apresentasaun orsamentu tinan fiskál kada tinan.

Primeiru Ministru Ezersisiu garante molok tinan ida ne'e remata ezekusaun OJE 2014 bele atinji porsentu 80.

“Agora ezekusaun orsamentu tinan 2014 nian tama ona ba porsentu 64, ne'e pasu pozitivu ida di'ak tebes,” nia tenik.

Tuir planu, orsamentu tinan fiskál 2015 ho montante \$1.5 billoens, governu liu-hosi Sekretáriu Estadu Parlamentár sei apresenta ba Parlamentu Nasionál iha loron 15 fulan-Outubru, tinan ida.

Governu liu-hosi Ministériu Finansa lidera nu'udar Komite Revizaun hala'o revizaun orsamentu iha nivel tékniku no nivel polítika hodi prepra ba orsamentu fiskal 2015.

Maibé antes ne'e Xefe Gabinete Ministra Finansas, Helder Lopez informa, diskusaun ba orsamentu tinan 2015 iha nivel rua, nivel tékniku no nivel polítika.

KRO diskute orsamentu tinan fiskál bazeia ba ekipa nivel tékniku kona-ba despezas rekorentes no despezas kapital dezenvolvimentu.

“Nivel tékniku hotu ona, entaun inkontru ohin ne'e halo diskusaun ba proposta orsamentu liña orsamentu ida-idak liu hosi nivel polítika. Envelope fiskal ne'ebé mak Konsellu Ministru aprova liu-hosi proposta kada ministériu ne'e mak \$1.3 billoens, número orsamentu ne'e uza hodi halo diskusaun iha nivel tékniku ho nivel polítiku, “Xefe Gabinete Ministériu Finansas, Helder Lopez informa ba jornalista sira iha salaun MF, foin laiais.

Ezekusaun OJE 2014 to'o oras ne'e ezekuta ona porsentu 64.9 hosi orsamentu orijinal \$1,500,00,254.00 (1.3 billoens) kompostu hosi kompromisu \$161,945,087.46, obrigasaun \$238,192,475.94, atual \$735,109,940.60, saldu \$364,752,750.00. **(vas/mj7)**